

1MDB: Dr Mahathir gesa Najib kemukakan bukti sah aset
Astro Awani
Julai 08, 2015

KUALA LUMPUR: Mantan Perdana Menteri Malaysia, Tun Dr Mahathir Mohamad menggesa perdana menteri Datuk Seri Najib Abdul Razak untuk mengemukakan bukti secara terbuka bahawa semua asetnya adalah sah di sisi undang-undang.

[Dalam satu temu bual bersama BBC](#) pada Khamis, Dr Mahathir berkata apa yang dilakukan oleh Najib sebelum ini hanya menafikan tuduhan, namun tiada bukti yang disertakan.

"Mengapa beliau (Najib) tidak menjawab segala tuduhan yang dibuat? Apabila dituduh atas sesuatu perkara, beliau menganggap ia seakan satu rancangan. Itu mengarut.

"Mudah saja untuk beliau buktikan jika tuduhan itu tidak benar. Suruh pihak yang bertanggungjawab memeriksa akaun banknya. Itu sahaja," kata Dr Mahathir.

Dalam temu bual tersebut, Dr Mahathir turut menafikan bahawa beliau mempunyai niat menjatuhkan Najib.

"Saya tahu mengenai 1MDB daripada akhbar antarabangsa dan saya tanya orang tempatan mengenainya.

"Adalah tidak benar saya berniat menjatuhkan Najib dan saya tidak bekerja dengan media antarabangsa," jelas Mahathir.

Pada 7 Julai, satu Pasukan Petugas Khas [telah membekukan enam akaun bank](#) berikutan dakwaan *The Wall Street Journal (WSJ)* bahawa AS\$700 juta (kira-kira RM2.6 bilion) telah disalurkan ke akaun peribadi Najib.

Kenyataan mengenai langkah pembekuan itu dikeluarkan oleh Peguam Negara, Tan Sri Abdul Gani Patail, Gabenor Bank Negara Malaysia, Tan Sri Zeti Akhtar Aziz, Ketua Polis Negara, Tan Sri Khalid Abu Bakar dan Ketua Pesuruhjaya, Suruhanjaya Pencegahan Rasuah Malaysia Tan Sri Abu Kassim Mohamed.

Dakwaan itu bagaimanapun dinafikan Najib dan 1MDB.

Terbaharu, Peguam Negara Tan Sri Abdul Gani Patail mengeluarkan kenyataan pada Rabu menjelaskan bahawa tiada di antara akaun-akaun yang dibekukan itu milik Najib.

Copyright © Astro Awani Network Sdn. Bhd. 2014 (535275-D).

Source: <http://www.astroawani.com/berita-malaysia/1mdb-dr-mahathir-gesa-najib-kemukakan-bukti-sah-aset-65127>